

ԳԻՏԱԿԱՆ ՆՍՏԱՇՐՋԱՆ՝
ՆՎԻՐՎԱԾ ԿԱՐԼ ՄԱՐՔՍԻ ԾՆՆԴՅԱՆ 150-ԱՄՅԱԿԻՆ

Մայիսի 12—13-ը ՀՍՍՀ ԳԱ նիստերի դահլիճում տեղի ունեցավ ՍՄԿԿ Կենտկոմին առընթեր մարքսիզմ-լենինիզմի ինստիտուտի հայկական ֆիլիալի և ՀՍՍՀ գիտությունների ակադեմիայի համատեղ գիտական նստաշրջանը՝ նվիրված գիտական կոմունիզմի հիմնադիր Կ. Մարքսի ծննդյան 150-ամյակին:

Գիտական նստաշրջանը ներածական խոսքով բացեց Հայաստանի կոմկուսի Կենտկոմի քարտուղար Գ. Արզումանյանը:

«Կարլ Մարքսը և գիտական կոմունիզմի հիմնավորումը» զեկուցումով հանդես եկավ ՀՍՍՀ ԳԱ ակադեմիկոս, հասարակական գիտությունների բաժանմունքի ակադեմիկոս-քարտուղար Ս. Աղայանը: Մարքսը, ասաց նա, աշխարհը վերափոխող իր ամենազոր ուսմունքով նմանը չունեցող գիտական մտքի մի հսկա էր: Իր բազմաթիվ աշխատություններում նա ոչ միայն ցույց տվեց կապիտալիզմի արատներն ու անկման անխուսափելիությունը, այլև ճշմարտացիորեն որոշեց հին աշխարհի խորտակման և սոցիալիստական հասարակարգի ստեղծման ուղիներն ու հեռանկարները:

ՀՍՍՀ ԳԱ ակադեմիկոս Ա. Առաքելյանի զեկուցումը նվիրված էր «Կարլ Մարքսը և սոցիալիզմի քաղաքատնտեսության պրոբլեմները» թեմային: Զեկուցողը մանրամասն անդրադարձավ սոցիալական տարբեր բովանդակություն ունեցող տնտեսական օրենքների և կատեգորիաների մասին մարքսյան դրույթներին, արդի փուլում սոցիալիստական էկոնոմիկայի կարևոր խնդիրներին:

ՀՍՍՀ ԳԱ ակադեմիկոս Ա. Կարինյանը «Կարլ Մարքսը և մշակույթի հարցերը» զեկուցման մեջ լուսարանեց Կարլ Մարքսի նախասիրությունները ժողովուրդների մշակույթների նկատմամբ: Նա նշեց, որ Մարքսը մեծ հետաքրքրություն է հանդես բերել ուսական իրականության, նրա պատմության, մշակույթի, քաղաքական իրադարձությունների ու հեղափոխության նկատմամբ:

Տնտեսագիտական գիտությունների թեկնածու Ա. Եղիազարյանի զեկուցումը նվիրված էր «Կարլ Մարքսը և ազգային հարցը» թեմային: Զեկուցողը նշեց, որ գիտական կոմունիզմի հիմնադիրներ Մարքսն ու էնգելսը «Գերմանական գաղափարախոսությունը», «Կոմունիստական կուսակցության մանիֆեստը» և մի շարք այլ աշխատություններում դրել են ազգային հարցի տեսության հիմքերը:

Պատմության մատերիալիստական ըմբռնման մարքսյան տեսության լուսարանության էր նվիրված պատմական գիտությունների դոկտոր Լ. Բաբայանի «Կարլ Մարքսի պատմության մատերիալիստական ըմբռնման տեսությունը» զեկուցումը:

Պատմական գիտությունների թեկնածու Վ. Ավետիսյանը «Հայաստանում մարքսիզմի տարածման պատմությունից» թեմայով զեկուցման մեջ նշեց, որ դեռևս 1887 թ. արտասահմանում հայերեն թարգմանվել է «Կոմունիստական կուսակցության մանիֆեստը», որը, սակայն, գրաքննչական նկատառումներով լույս չի տեսել: Անդրադառնալով հայ իրականության մեջ մարքսիզմի տարածմանը, զեկուցողը ասաց, որ ինչպես Ռուսաստանում, այնպես էլ Հայաստանում մարքսիզմի տարածումը և հեղափոխական սոցիալ-դեմոկրատիայի զարգացումն ընթացան Վ. Ի. Լենինի ղեկավարությամբ և գաղափարական ազդեցությամբ: Ստեղծվեցին նաև հայ մարքսիստական խմբակներ, որոնք հսկայական գործունեություն ծավալեցին մարքսիստական գաղափարների տարածման ուղղությամբ:

Պատմական գիտությունների թեկնածու Վ. Ղազանյանը «Կարլ Մարքսի և Ֆրիդրիխ էնգելսի երկերի հայերեն հրատարակությունը» զեկուցման մեջ խոսեց գիտական կոմունիզմի հիմնադիրների գործերի հայերեն թարգմանության և հրատարակման, ինչպես նաև հայ հեղափոխական մտքի զարգացման գործում այդ երկերի ունեցած հսկայական նշանակության մասին:

Ա. ՍԱԴԱՂՅԱՆ